

Starfsáætlun
Leikskólinn Akur
fyrir skólaárið 2019-2020

HJALLASTEFNAN EHF



Um leikskólann

Leikskólinn Akur er til húsa að Tjarnabraut 1. Skólastjóri á komandi starfsári er Sigrún Gyða Matthíasdóttir og er Guðrún Lilja Jónsdóttir meðstjórnandi. Skólaárið 2019 til 2020 er 12. starfsár leikskólans. Leikskólinn er rekinn af Hjallastefnan leikskólar ehf. samkvæmt þjónustusamningi við Reykjanesbæ.

Starfsáætlun þessi tekur gildi þann 1. september 2019 og er skilað til Hjallastefnunnar ehf. og Reykjanesbæjar.

Tölulegar upplýsingar - börn

Fjöldi barna er áætlaður 130 börn, 66 stúlkur og 64 drengir. Dvalarstundir eru ekki enn endanlega fastsettar svo snemma að hausti en að svo stöddu eru flest börnin í 8 tíma vistun eða meira eða alls 123 börn. Alls 6 börn eru í 6 til 7 tíma vistun og 1 barn í 6 tímum eða minna.

Fjöldi þeirra barna sem fyrirsjáanlegt er að njóti sérkennslu er a.m.k 3 drengir og 1 stúlka.

Fjöldi barna sem hafa íslensku sem annað eða þriðja mál er 33.

Starfsmannamál

Starfsmenn leikskólans Akurs næsta skólaár verða 34 talsins í 32 stöðugildum. Þetta getur þó breyst þegar vistunartími barnanna er endanlega staðfestur og þörf fyrir sérkennslu hefur verið metin. Hjallastefnan stendur fyrir öflugum samstarfi allra Hjallastefnuskóla um starfsþróun og símenntun starfsfólks en að auki gefst starfsfólki kostur á að sækja sér menntun og starfsþekkingu úr öðrum áttum og hvetur leikskólinn Akur starfsfólk sitt eindregið til þess. Um starfsþróun og símenntun má nánar lesa í símenntunaráætlun leikskólans.

Faglegar áherslur

Leikskólinn Akur starfar eftir hugmyndafræði Hjallastefnunnar. Hugmyndafræðin byggir í stórum dráttum á hugsjónum um jafnrétti og velferð og henni er lýst í skólanámskrá leikskólans, í bókinni „Æfingin skapar meistarann“ eftir Margréti Pálu Ólafsdóttur höfund stefnunnar, í ýmsum ritum útgefnum af Hjallastefnunni ehf. og á fræðsluvef félagsins.

Leikskólinn starfar að sjálfsögðu einnig á grundvelli Aðalnámskrár leikskóla frá árinu 2011 og er útfærslum á markmiðum hennar lýst í skólanámskrá leikskólans.

Auk Hjallastefnunnar og lögbundinna áhersluþátta í Aðalnámskrá leikskóla á leikskólinn Akur sér sínar sérstöku áherslur: Fjölmennungur er okkur ofarlega í huga og

erum við með fjölmeningaverkefni í gangi til þess að tengja betur heimili og skóla fjöltyngdra barna. Þá leggjum við áherslu á að skólinn útvegi túlkþjónustu þegar þess er þörf og að foreldrar af erlendum uppruna sé boðið að koma og kynna fyrir börnum og kennurum þætti úr menningu heimalandsins, hvort sem það er í formi matargerðar, tónlistar eða staðarhátta.

Við erum með öflugt 5 ára starf á leikskólanum og undanfarin ár hefur verið áhugi fyrir því að efla og bæta útisvæði skólans. Á síðasta skólaári var sett upp nýtt leiktæki á lóð skólans ásamt því að haldið verður áfram að rækta upp lóðina. Foreldrar og kennarar hafa gróðursett tré nýlega og búið er að byggja hæsnakofa á lóð skólans en áætlað er að hænur flytji inn í hann fyrir veturinn.

Aðalmarkmið komandi skólaárs verður að kafa dýpra í hugmyndafræði Hjallastefnunnar, leggja áherslu á málörvun og auka gæði í barnastarfi. Einnig stefnum við að því að starfsfólk deili fagþekkingu sinni um húsið og fræði samkennara og nemendur um ákveðin málefni sem kennarar eru sérfróðir í og þekkja vel. Þannig fá allir vel að njóta og læra um hin ýmsu málefni t.d numicon, styrkleikar, lubbi finnur málbein, kynjanámsskrá og margt fleira.

Nánari útfærslu á fagstarfi, hugmyndafræði, markmiðum og leiðum má sjá í skólanámsskrá Akurs.

Mat og umbætur

Leikskólinn Akur stendur á hverju ári fyrir umfangsmiklu innra mati sem að nokkru er hluti af reglubundnu innra eftirliti Hjallastefnunnar ehf. s.s. spurningakönnun fyrir foreldra, spurningakönnun fyrir starfsfólk, athugun á lögbundnum gögnum skólans og rekstrarskoðun útisvæðis, en að nokkru er innra matið einungis á vegum leikskólans og er notað innan veggja hans, s.s. gátlistar fyrir foreldraviðtöl, skráning á vali og úrvinnsla úr hópatímaskráningu. Á grundvelli niðurstaðna úr innra mati hvers skólaárs vinnur leikskólinn umbótaáætlun. Ítarlega útlistun á innra mati leikskólans og umbótaáætlun má finna í skýrslu hans um innra mat.

Ytra mat á skólastarfinu er í höndum sveitafélags og Menningar- og Menntamálaráðuneytis. Heilbrigðisyfirvöld kanna aðstæður í leikskólanum reglulega og útisvæðið er aðalskoðað af faggildum aðila árlega.

Samstarf við grenndarsamfélag

Leikskólinn Akur leggur sig fram um góð samskipti við grenndarsamfélagið. Á hverju ári bíður bókasafn bæjarins börnunum á Akri að koma reglulega í bókalestur en við höfum minnkað það samstarf og lagt meira í samstarf með bókasafni Akurskóla. Listahátið barna í Reykjanesbæ er á hverju ári og hefur leikskólinn tekið virkan þátt í henni. Leikskólinn Akur, Leikskólinn Holt og Akurskóli ásamt Stapaskóla hafa staðið að samvinnuverkefni yfir þorrann sem nefnist Þorrafema. Þar er um stöðvavinnu milli skólanna að ræða þar sem skipst er á fróðleik og skemmtun með tengingu við þorrann svo fátt eitt sé nefnt. Einnig er Akur með óformlegt samkomulag við Víkingaheima um að fá að koma með barnahópa þangað.

Samstarf við fjölskyldur

Leikskólar Hjallastefunnar setja samstarf við foreldra og fjölskyldur leikskólabarna í öndvegi. Leikskólinn Akur stendur reglulega fyrir atburðum sem efla samstarf leikskólans og heimilisins auk þess sem óreglulegum uppákomum sem tengja fjölskyldur við leikskólann er fagnað. Á komandi skólaári er fyrirhugað að halda foreldramorgna, en við bjóðum þá foreldrum að koma og njóta morgunsins með okkur og borða morgunmat með börnunum sínum. Hjá yngstu börnunum bjóðum við foreldrum að koma og njóta nónverðar með okkur þar sem litlu krílunum getur þótt það ruglingslegt að foreldrar staldri við að morgni. Áætlað er að halda ömmu og afa morgna á komandi skólaári ásamt því að efla samstarf við grenndarsamfélagið. Öllum foreldrum er ávallt velkomið að koma og styðja við starfið í skólanum. Á bóndadaginn bjóðum við í karlamorgunverð og á konudaginn bjóðum við í konukaffi. Þessir foreldra/fjölskyldumorgnar hafa mælst vel og er frábær mæting ár hvert. Áætlað var síðasta skólaár að kanna áhuga foreldra á áframhaldi á foreldraspjallsmorgnum í hverri lotu kynjanámskrár en þeir sóttust ekki nógu vel að því sinni. Það má vera að Akur bjóði aftur upp á þessa spjallmorgna á komandi skólaári.

Einnig er gaman að segja frá því að foreldrar og starfsfólk hafa sameinast um að elsti árgangur Leikskólans Akurs fari nú árlega í tveggja náttu ferðalag á vordögum ásamt kennurum í Vatnaskóg. Jómfrúarferð Akurs var farin 2017 og var almenn ánægja með ferðina. Svo mikil ánægja í raun að foreldrafélagið sá ástæðu til þess að gefa öllu starfsfólki skólans glaðning í þakklætisskyni fyrir vel unnin störf. Því munum við stolt halda áfram að fara tveggja náttu ferðalag og vorið 2018 og 2019 gengu ferðir einnig glimrandi vel.

Foreldraráð þriggja foreldra er starfandi við skólann og er hluti af stjórnkerfi leikskólans. Í foreldraráðið er kosið í september ár hvert á opnum foreldrafundi. Foreldraráð fundar að minnsta kosti tvisvar á starfsárinu og gefur umsögn um starfáætlun og skóladagatal svo og skólanámskrá leikskólans.

Foreldrafélag er einnig starfandi í tengslum við skólann og stendur það fyrir margvíslegum uppákomum sem gleðja börnin s.s. sumarhátíð, leikritum og fleiru. Foreldrafélagið hefur frjálssar hendur um dagskrá í samvinnu við leikskólann og er gaman að segja frá því að dagskráliðir eins og páskaeggjaleit og sumarhátíð hafa fest sig í sessi.

Upplýsingar um dagsetningar helstu viðburða í foreldrasamstarfi er að finna í meðfylgjandi skóladagatali.

Skóladagatal

Meðfylgjandi er skóladagatal fyrir skólaárið en það tekur einhverjum breytingum sem uppfærðar eru jafn óðum á vefútgáfu skóladagatalsins á Hjallavefnum [Leikskólinn Akur](#)

Reykjanesbær, 1. september 2019

Foreldraráð leikskólans Akurs hefur kynnt sér starfsáætlun þessa og samþykkir hana fyrir sitt leiti.

Með bestu kveðju,

f.h. foreldraráðs leikskólans Akurs